

長樂縣志卷二十四

列傳四 循績

民牧稱職分所應爾似無足奇者然德足以善政化民才足以理煩治劇倘亦盛其遇而推其量焉則與廟堂風憲未必有軒輊於其間乃功名事業而僅以循良稱蓋爲職所限也雖然其政績亦千古矣傳循績

宋

潘鯁字昌言曾祖吉甫仕吳越歸宋終國子博士祖衢大中祥符元年擢第知同安縣累遷檢校屯田郎中歷知興化軍建州軍州事終知黃州遂家焉比鯁長復歸閩從周希孟受學登元豐二年進

長樂縣志

卷二十四

列傳四

一

循績

士初調蘄州蘄水縣尉民有以花爲獻者鯁一嗅而還之曰受賜多矣其廉潔類此遷知州防禦推官知江州瑞昌郡賦屬縣鬻建茶守問君瑞昌歲可售若干鯁曰四斤耳守詰其說鯁曰縣小民貧米鹽猶不足而暇及茶乎獨縣僚四人一斤可矣守悟以故諸縣皆得無多售後七年以事過瑞有兩民拜馬前其一曰異時君爲縣我訟得直其一曰異時君刑我當罪我心服是以偕來徒監楚州都鹽倉尋爲吉州軍事推官元祐赦民負官錢無姦者悉免之通判攝守事悉下負者於獄將鞫其姦鯁曰赦欲寬之而君故獄之耶執不可民賴以免龍泉令捕得私釀三十家將上府鯁謂令曰是法皆當徒龍泉小邑一日徒三十人君爲令安乎令乃頗

減出之改宣德郎監漢陽軍酒稅遂以奉議郎致仕仍居於黃卒年六十有三子大臨字邠老以詩名於時道光通志

張本中字崇正紹興元年知連州陽山縣勞力撫字春秋循行阡陌教民稼穡察歲豐儉而施之以政民皆遵行之舊俗婚喪以歌唱為禮本中下令嚴禁風為一變乾隆賀志參道光通志

鄭疆字南美紹興初知汀州廟學荒圯疆首度地建之且市腴田以增廩餼擇嚴師以職教道於是人以不學為恥越三年登進士者四人後立祠於稽古閣下春秋祀焉乾隆賀志

劉嘉猷字德徽嘉譽弟嘉譽傳見儒林紹興間樞密院使鄭穀奏補將士郎銓中優等調南安軍上猶縣令縣素號難理究心撫字吏畏民懷

長樂縣志

卷二十四

列傳四

二

循績

適強寇犯境密設方略俘執三十餘人以功轉宣教郎調常德龍陽縣值荒旱大家富室閉糴幸災猷痛懲之邑人賴以全活後解組歸龍陽數百人送至其家勒官德二字於籌山之峰其山遂以官德名焉同治彭志

陳伯嘉西隅人紹興中以軍功陞吉州太和縣西平山巡檢累平兇盜卒民廟祀之乾隆賀志參道光通志

劉師尹字伯任登紹興二十一年進士調汀州錄事參軍與通判向士俊爭學諭葉椿獄不勝投劾棄官歸築室於黃江之野有終焉之計既而椿獄直得旨復還本任由是劉錄事之名聞天下秩滿召對稱旨改承事郎未幾除大理寺丞讞獄務從寬恕擢戶部郎

官復遷度支郎官版曹故稱劇任師尹遇事持大體諸所更張曲盡利害之實雖久於金穀者莫之能易建議豁免無名賦稅二廣江浙之民咸被其澤立朝數月驟致通顯士大夫間猶以劉錄事稱之高宗知師尹賢有陳請輒可其議會得疾丐外除提舉浙東常平茶司就醫於富陽縣而卒歷階左奉議郎同治彭志參道光通志

林宗顯字孝揚乾道間知建甯縣聽訟精明案無留牘利弊悉與興

除民立祠東山祀之乾隆賀志

李角字定國寶慶二年進士累官潮州通判明察果斷決獄多所平

反以良牧稱乾隆賀志

韓璧淳熙中爲瓊管帥始至釐籍薄征教以耕耨紕官吏無狀者爲

長樂縣志

卷二十四

列傳四

三

循績

民陳禮義廉恥之意以開曉之又表從化者以厲不率出入阡陌勞來不怠期年民吏浹和黎人感悅乃作新州學海外之士皆有以自表於當世朱文公有記乾隆賀志

卓洵字士直慶元間知吉州泰和縣留心水利勸置沿溪六閘灌田

萬畝一方永食其澤乾隆賀志參道光通志

林枏淳熙中授閩縣簿改福清丞以清惠稱嘗捐俸脩學後知州事

闢城四千丈竣事而民不擾在郡簡訟寬賦民甚便之乾隆賀志

王益祥字謙叔後徙居閩縣登淳熙十一年進士歷桂陽建康教授興學校增生徒士風不變後以陳傅良張杓薦歷監簿編修說書出知甯國改處州時嚴僞學之禁丐祠去遷江東提刑以里人陳

自強爲相棄官歸

乾隆賀志

林岳字仲山淳熙丁未進士知汀州勸書院二所與六邑士講訂詩

書邑學皆有祠歷太常少卿

乾隆賀志

陳曄字日華慶元初知汀州事爲治精明以郡帑錢二百貫助學又

以隸官田百畝充諸生廩餼減戶口食鹽價作義塚掩遺骼無歸

者汀俗尙鬼信巫曄嚴禁之俗遂不變

乾隆賀志

陳映曄之弟慶元初知汀州事爲政一守其兄之法首蠲積逋減徭

役又蓋五營屋千餘間甃清流路百四十餘里曄嘗創橋於南山

高灘角至映方畢工郡人因以棠棣扁之秩滿皆遷廣東憲

乾隆賀志

林伯成開禧中知眞州築城五百餘丈鑿河深廣之翼城之築自伯

長樂縣志 卷二十四 列傳四 四

循績

成始

乾隆賀志

陳逢寅嘉定進士有文名授浦城簿孳孳職守垂代仍朝夕泣事若

始至然浦城簿廳自南渡後無題名逢寅始爲之而請眞德秀爲

記

乾隆賀志

陳紱字若悔寶慶二年進士調贛州興國縣尉改泰甯主簿滯貧十

年泉州守李韶以攝局招廣東轉運司黃樸以郡掾辟皆辭不往

轉韶州司戶兼司法以廉平稱攝知仁化縣移攝樂昌祀周敦頤

及程顥程頤朱子於學士經指授者多所成就再調提刑司幹辦

公事薦知惠安縣

道光通志

潘周伯字宗之蔭補將仕郎紹定初改彬州桂東縣丞桂東在萬山

中爲湖南江西廣東三路門戶其民暴悍易動周伯推誠撫綏民安其政郴盜高垓寇桂陽檄攝令事往救周伯曰解圍不如搗虛自提官軍義勇入戰賊洞中主簿何琛死於陣周伯氣愈厲相持巖谷數日出奇掩襲垓先奔諸黨隨潰帥司益知周伯能一以招撫委之周伯曰屈以力易得其心難吾爲張綱可也單騎造賊巢穴不以兵隨羣獠出迎拜曰我輩非敢弄兵自速禍常時不堪侵枉使我至此公生佛也今惟令是從周伯惻然曉以逆順禍福聞者相顧泣下送周伯還邑咸跪請曰公苟有命願盡死力以報諸峒聞風相繼聽命適寇大擾江西吉州守趙彥覃以檄求援周伯遣七甲義士助之盜首舒慶二自隕黃十五乞降事聞得旨因任

改官理爲須人仍與陞擢差遣周伯於是儲粟治藥勸立義塚使饑者病者歿者有所資復請卹死事之家旌孝婦之節新學宮增教員蠻俗爲之一變添差通判潭州嘉熙元年蒙古犯邊邊帥檄召七甲三洞兵策應周伯卽日就道點集壯勇八百人直抵壽昌突圍以進敵酋驚顧曰赤脚蠻兵來矣遂退去詔轉三官秩滿除監左藏東庫丐外出知潯州周伯以嶺民去朝廷遠疾痛不得上聞孜孜然如理家事蠲例券損浮費代民輸夏稅一年安撫使謝達上周伯治行累數百言不報繼知韶州以父諱辭改靖州初周伯以守潯陞辭援漢唐蒙晉董元二事痛言蜀廣可通之路黔鬱共下之江宜豫爲經畫及抵渠陽訪求大理蹊徑嚴加防遏未三

月爲侍御史周坦所論罷職予祠主管崇道觀其後蒙古帥幹腹兵果由蜀江而下人始服其先見尋擢廣東安撫司參議有諫官居寓里欲請大奚山墾田同僚憚其聲勢噤斷闕筆周伯奮然曰此盜壑也居海中心昔在淳熙爲朝廷憂甚久幸而鋤薙不許生聚種植其間著在令甲是烏可許事遂寢聞者避之未幾請老卒於家積階至朝議大夫

道光通志

陳容字公儲自號所翁西隅人端平二年進士令平陽闢道路通溝洫議賑糴脩學宮從容簡易政修務舉時集諸生講論經義士風大鬯暇則與佳士論文賦詩凡山川勝蹟多留題咏嘉熙間通判臨江軍州事以才名受知理宗入爲國子監主簿官至朝散大夫

長樂縣志

卷二十四

列傳四

六

循績

賈似道欲招致幕下容酒酣輒卑侮之似道亦敬而不怒出知興化軍詩文豪壯尤善畫龍變化欲活世傳所翁龍是也子夢發龍興府判

乾隆賀志參道光通志

明

王堅字子正號三山老樵海路人洪武庚戌辟至京師試高等授湖廣按察司僉事左遷知忠州改澤州洩政勤慎興學教民頌聲大著以薦入待詔翰林尋除刑部郎中以直言忤尙書開濟濟讒於帝謫嘉興府同知朝士送之曰嘉興民不好善自爲之堅曰天下有不好官不曾有不好百姓官好百姓自好至則問民疾苦分憂革弊出女囚無辜者六十二人民情信服未三月放歸田里晚號

介軒有三山樵稿

乾隆賀志參
道光通志

陳祖字富文十三都人洪武四年以明經薦授新繁縣丞道遇嫗哭甚哀問之曰夫與子俱喪止餘一孫十歲昨爲大蛇所啞祖令具狀移牒城隍限日勅蛇至公庭及期果有羣蛇集庭下祖諭曰無干者退獨一大蛇伏不去祖命磔之遷光山知縣一日有羣葉旋舞不下其一落案上取視旁若有竅令吏隨葉跡之果有屍祖曰殺人者葉孔也捕得之果伏辜尙書開濟薦祖自代未及用而卒

祀鄉賢名宦

乾隆賀志參
道光通志

陳仲進字伯康江田人性耿介尙氣節洪武中以明經薦授宜陽縣丞攝治孟津三載考最調韓城擢知江山縣以德化民朝廷特褒

長樂縣志

卷二十四

列傳四

七

循績

嘉民爲立生祠後以勘災傷忤旨被逮仲進曰吾以一身活萬命含笑地下矣旣而釋之卒於京歸櫬經江山父老泣留衣冠以葬子孫遂家焉祀鄉賢子登傳見文苑

乾隆賀志參
道光通志

陳銘字以義洪武中以貢入太學擢衡州府推官聽斷公明母憂去官民挽留涕泣服闋以王孟薦擢大理右評事卒於官銘有至行母患風疾久臥弗起與兄震晨夕扶持弗少怠震爲人所誣被逮銘走京師力爲伸雪竟得直同郡友鄔孟爲御史得罪誅其妻王當沒官自經死人莫敢視銘收瘞之

道光通志

林源字士仁沙堤人洪武二十年以貢中應天鄉試永樂初知餘杭縣興學課士科目得人爲盛均賦役緩催科凡部使行縣詢林令

莫不以公勤廉敏稱云

乾隆賀志

林賜字伯予東林人洪武癸酉鄉試第一永樂間教諭樂平學問該

博持守端嚴巍然一時之望

乾隆賀志

方懋字叔勉一字黽字先世由莆田徙長樂懋聰穎好學夜忘臥扁擔以警睡年十八與陳良林賜王錫友善懋舉永樂庚子鄉試知浙江開化縣廉直自矢不徇權貴不受干請懲頑梗平寬濫吏民歛戢盜不入境邑有爭水利者累歲不決懋一言折之輿論大快值大水爲災溺死者浮屍蔽江悉收瘞之病者予藥物饑者給薪米全活無算在任十載以卓異陞通判未上卒士民醵金歸葬建祠祀之

道光通志

長樂縣志卷二十四

列傳四

八

循績

陳日光潭頭人成化中爲海豐丞邑僻而習玩前政率因循一切條網斃壞姦豪寢以不戢日光始振刷之抑強舉廢綽有賢聲罷去

邑人立石紀之

乾隆賀志參雍正通志

黃公甫成化間爲監利教諭善陶鑄士類講論不廢寒暑同舍訓導卒公甫爲存諸生賻金適寇至盡掠其貲獨所賻金故在也悉持歸同舍子人咸服其義行

乾隆賀志

王有恬字德安潭頭人幼穎慧好學成化乙未進士歷南京戶部郎中出爲江西督糧參議先時民逋稅皆由豪宗包攬代輸以故久負有恬至下令釐革悉督入官稅以無逋淮王就封國道經九江費鉅萬有恬酌省其半以寬民力後自免歸杜門三十餘年終身

窮約世味澹然祀於鄉

乾隆賀志

李時儀字端夫

人宏治間以貢知穎上縣省刑薄斂不阿貴勢

邑人以板李目之編戶增爲一十九里去後民猶頌之

乾隆賀志

陳讓字允恭一字半陶十三都人父德隆以孝廉歷浦江曹縣上海

新建教諭三十年清修飭己以師道自任卒祀於鄉讓其長子也

宏治乙卯舉人授石城令以廉明稱三載報政時劉瑾竊柄遂棄

官歸弟讚字允揚一字三峰嘉靖癸未進士爲戶部郎中遷湖州

守廉潔自持擢貴州兵備道致仕歸足跡不入城市

乾隆賀志

謝廷瑞字邦應江田人宏治壬戌進士知瓊州府數載有經畧而心

事炯然威懾峒黎民藉貼席瓊之父老稱爲百世牧模

乾隆賀志

長樂縣志

卷二十四

列傳四

九

循績

陳大濩字則殷正德辛巳進士授上虞知縣抑巨室伸單弱諸貴有

力人弗便之日毀諸上官尋調光山故事光山民調役他縣值歲

饑符猶及之大濩抗詞爭曰天降災於下邑奈何又重之虐孳民

之道也臺使者無以難寢其役用薦行取入京奸人中以上虞事

諸同徵者率補御史給事而大濩得隰州知州復爲巡鹽御史所

劾然大濩甫至已捐州四門榷稅廉聲大起吏部爲格御史章遷

思恩府同知關水關築罨廬戢盧蘇王受餘黨俄陳牒歸幘被蕭

然教授里中兒自給先後邑令數造請不能得也朱紈巡視閩中

願一見竟辭謝紈歎息去子省傳見名臣

道光通志

李性字仲復仙山人嘉靖癸未進士知東莞縣不以家累自隨政尙

平易公庭肅清吏胥望而畏之時勢豪奪海利性追而歸之蠶民

徭役悉均里中不擾稱良令云官至辰州知府乾隆賀志

高廷忠字允卿后澳人祖伯齡字平哲成化十六年舉人知零都縣

有惠政時稱循吏父壻傳見鄉行廷忠嘉靖乙酉舉人授奉化令

甫至卽除法之不便於民者十餘條每日戴星出入不務釣名惟

順人情宜土俗期於政行事集而已尤能節用不濫費不苟取有

饋海錯潛置金其中者卽默返之不揚於衆值夏旱屏蓋步禱凡

五日雨如注民賴不饑爲立祠以祀乾隆賀志

鄭源彬字與宜號梅崗西隅人年十七領嘉靖乙酉鄉薦癸丑成進

士除南直隸壽州知州州大水源彬殫以方畧得無害民繪圖懽

長樂縣志 卷二十四 列傳四 十 循績

傳之州之正陽歲輸官磨稅千緡例金若干源彬悉蠲罷之政暇

遊八公山題詠諸名勝殆遍民鐫其詩於石並立祠勒碑以頌德

政轉北直隸開州知州開故古澶淵地也逾年政通民和宣績詳王崇慶

州記擢南京戶部浙江司員外陞本部陝西清吏府郎中克舉其職

年三十六卒官同年陳殿撰謹等誄之以文著有梅崗詩選崇禎

癸未署長樂令劉明遇爲之序探鄭氏家譜

石梁字士升號觀海古槐人嘉靖己酉舉人癸丑進士知浙江龍游

縣孳孳爲民以興利誅不善恤冤滯寬逋爲己任罰無贖金罪未

等不責供在官七月以勞動卒俸無餘金至不能殮士民會哭釀

金賻其喪以歸建祠祀之事績載龍游縣志後其族人董溪道龍游過其

祠父老羣揖而進之曰是石爺之親也為之潛然據石氏家譜

林恕字道近渡橋人嘉靖己丑進士授江西知縣歷都察院經歷擢守雷州有惠政濬湖渠築海堤為民利鋤強扶弱不避權貴郡人鑄石於庭紀其績官終雲南按察使同治彭志

林山字士人古槐人嘉靖己丑進士授萬載令以最擢戶部郎部長李某不習錢穀事又交通諸貴人屢有所請事下山山持不可李強之持愈堅怒欲擠以事山曹事辦不能害也李罷金陵梁材代為尚書材名臣也顧獨賢山執法薦知徽州徽素號劇郡民賈四方富而喜訟諸貴人牘刺干請動至盈篋山一切謝絕斷獄明察期年訟減郡稱大治擢廣東副使以親老丐歸養時年甫四十餘

長樂縣志 卷二十四 列傳四 十一 循績

山為人強毅任勞不恥惡衣食當官而行必信其志而後已然自恃清節好面折人過鄉人或有不諧者卒祀於鄉乾隆賀志

李不顯字憲文湖南村人嘉靖乙未進士初以舉人權休甯教諭操行廉正日集諸生談經校藝士悅服之既登第知永嘉治劇理煩愛民養士賢聲大著擢南京監察御史終贛州知府嘗著四書及詩經達說士子戶誦至今猶稱貞菴達說見贛州溫州二郡志祀於鄉乾隆賀志

陳懋觀字孔質江田人嘉靖癸丑進士知會稽縣甫數月政聲流浹以憂歸服除補山陰令懋觀為人廉靜寬和順民好惡緩征簡訟恬淡若寒士邑當前令暴虐之後民喜若更生徵拜給事中以言事謫推官調南京吏部郎中出知廬州府遇士以禮斷獄不輕入

人罪士民愛慕不啻會稽山陰也戊辰觀還渡淮舟覆不死人謂天實庇之尋卒於官越民祠於臥龍山麓後祀於鄉

乾隆賀志

陳復升字以見一字見菴十三都人嘉靖丙辰進士任海南道副使時因島寇議徙珠崖民於內地復升請築土堡防守得罷其役民為立祠祀之

乾隆賀志

林繼衡萬歷丙戌進士知溫州府設策平伏莽之奸措餉安脫巾之伍葺學宮修塘埭汰庫頭以便僉收調折色以絕侵漁惠政傳於

一時

乾隆賀志

蔣行義字思弼一字恪箴萬歷丙戌進士令永嘉以艱歸起補淇縣俱文無害擢南戶曹轉司空屬持介不阿有貴人負重名者欲取

長樂縣志

卷二十四

列傳四

十二

循績

瓦屑壩為別墅堂屬莫敢爭力持之司空歎服行義大失貴人歡遂以此乞歸山居二十年蕭然自足子奕芳庚子舉於應天好古篤行能肖其父

夏充彝論云蔣公自志其墓其言寥寥如第謂質抗善忤人他徽行弗備也然人多稱公節行夫不自言其長者斯即公之

長也歟 乾隆賀志

葉時敏字志卿一字脩自沙京人萬歷戊子舉人授烏程教諭豪家以私怨修恡諸生有司亦甘心焉時敏爭之強乃免豪復搆某生扼其入試時敏一夜十往請於郡乃得試試果雋遷程鄉知縣縣在萬山中俗悍狡時敏鋤宿猾均田賦戒民鬻田久毋得訟賦法置匱於庭令里正自輸解程鄉俗與人釁則預養族之老病貧懦者使服毒或使其子弟殺之以傾怨家盡劫其產名曰瘦馬又豪

惡誘膏梁子弟與博產盡則相與入山爲盜名紅烏賊時敏下令
曰市瘦馬者以子弟殺父兄論民有掘毒草者許抵贖金不半歲
草盡瘦馬亦衰止又嚴治博徒置重法紅烏賊屏跡俗大變民又
苦礦稅時敏令民盡塞礦而爭於御史言蕞爾邑安所得二千金
語侃侃自旦至日中不休人皆縮舌御史素重時敏爲減十之八
逋寇李天爵嘯聚綠石坑謀乘令謁府從上游舟逆之因以爲亂
人情震駭城門盡閉時敏自他道歸開門視事如平時誘其魁殺
之餘黨悉解遷太平府永康知州永康故夷地州治草創無城垣
廨舍官署僅土室三楹覆以白茅居人不數百聞州守至不能備
餼廩家人竟不得食時敏進其父老與課計田糧戶口之數諸興

作次第而舉先是藩司發七白金爲繕治費前官不敢任時敏慨
然肩之築城垣四百餘丈建學宮及公府吏舍倉庫廟社一切剏
畫悉中規程不期月告成州人侏僂不曉詩書乃招客遊人通文
藝者三十餘人自是有弟子員又戒居民毋火葬毋健訟毋開鉛
井以貽禍遷衢州府同知督戎諸弁欲汰兵時敏曰汰兵無益徒
爲弁市耳且驅之爲盜令巡江上下以獲盜多寡爲殿最兵益奮
往餉金經數手乾沒時敏呼兵至廳事給之兵大悅漕卒轉輸都
下甚勞苦有力者率賄免往往喧訴於藩司獨衢州以派役平無
訴者又嘗堰西安江山田條免鹽商盤詰清屯田郵傳皆百世
利在衢八年轉山東運同以省母過家病作衢州祀時敏方迎木

主人祠而時敏以是日卒子有祿諸生夏允彝論云前令鄭月菴為余言葉有祿古君子也數過之談夜分卒無私余不及覩修自得之葉文忠董司空之文不及交有祿得之月菴三公非欺人者傳之也攸宜 乾隆賀志
參道光
通志

江塘字思登一字鎮魯雲路人萬歷壬辰拔貢授湖廣應山令遷江西臨江通判歷雲南石屏廣西新甯二州所至有政績在應山勤教養臨江平稅務石屏遏土官之虐新甯恤荒歉之災至今口碑不衰後引年歸足跡不至公庭時與鄉里族戚講明禮讓前後守令咸服其品焉卒祀鄉賢乾隆賀志

陳訐謨字以弼一字蓮湖江田人萬歷辛丑進士授刑部主事楚諸生有以忤璫使陷大辟者訐謨力脫之改戶部權濟關通旁港罷

長樂縣志 卷二十四 列傳四 十四 循績

小艇稅輿誦大起差竣以羨金五千輸內帑出知南昌府改蘇州豪滑逞淫沉貞婦於江而又陷其夫以盜獄成訐謨鞠雪之購得貞婦尸抵豪於法無賴少年偽稱徹侯胄子擁傳行所至供帳訐謨縛置之法衆稱神明郡人侯峒曾顧宗孟顧燕詒曹筌皆其所甄拔官終廣西按察司副使卒祀於鄉孫達字克亨早歲補諸生同學有陳聖泰程坤者負時名為人所中提學將治之達白其事得免由此知名唐王時以恩貢生授鴻臚寺主簿遷錦衣衛經歷魯王入閩起職方郎中擢鴻臚卿時鄭彩專政達獨不阿魯王敗達遁居海島以卒夏允彝論曰予令長樂顧公方為福兵憲曹公方為漳郡守每為予誦公之廉余每過滸關睹巨艘鱗次候啓關殊苦小艇從旁竄出入自如微獨免稅且無稽心善其法今乃知公所貽也兩公既為余稱誦之余又目覩公

善法豈阿公哉
隆賀志參道光通志

高士選字永標一字毅寰流水人萬歷丙午舉人初授尤溪教諭嗣調慶元教諭訓士多方擢廣東始興令正身率下理獄明決民德之再調浙江崇德令一以治興者治崇卒於官崇之人爲祀名宦清乾隆間祀本縣鄉賢祠子龍光傳見名臣賀乾隆志

清

謝兆麟字在紱一字天石江田人順治辛卯舉人授直隸真定縣邑當衝繁措理裕如真定土風有斃命者審視後以蘆草裹尸懸樹間枯骸暴露且時久移傷換骨弊端百出兆麟陳利害稟上官易以棺值聖駕北巡兆麟奏對稱旨欽取課最例遷秩未幾以勞卒

長樂縣志

卷二十四

列傳四

十五

循績

於官祀真定名宦賀乾隆志

王膺祺字哲鳴一字亨五梅花人幼倜儻有大志明崇禎末海氛方熾作平海論侍郎董應舉奇之年十九補弟子員適巡撫熊文舉征海失利下令禁海膺祺抗之巡撫欲陷以大辟奔入京將擊登聞鼓值明亡順治元年祺上懲貪疏旨嘉予之授晉州知州平滹沱河水患民立碑曰王公堤東里村有數十年積草內窟妖狐爲民害膺祺刈之以資公用狐妖頓息民繪像祀之擢湖廣岳常道因忤權貴解組歸時年四十五嘗自謂四十以前爲人所不敢爲始知天下事惟有志竟成四十以後止人所不能止始知天下事當見幾而作後家江西樂安縣三子廷廣歸守墳墓卒年八十餘

著太平新書三十章纂集太平清諭十六條及爰書金矢天籟等

集乾隆賀志

吳日來字子近一字海源十二都人幼岐嶷與弟道來亭亭玉立道來

傳見文苑有雲間陸陵之稱以前明副貢生授江夏知縣有政聲歸會

耿逆變作欲招致之抗節不從繫之獄大兵至始解卒年六十子

士宏傳別見乾隆賀志參道光通志

林子蘭字維丹一字雪崖十二都人順治辛卯舉人知廣東開平縣

潔己愛民鑿塘引水灌田千餘畝革檳榔稅陋規丁母憂服闋調

樂會知縣綏定苗變民共戴之乾隆賀志參道光通志

林鼎復字道極一字天友順治初大將軍范達禮薦授常州通判在

長樂縣志

卷二十四

列傳四

十六

循績

官九載每領運入都嘗為當事言白糧專運事繁力分倘能歸并附漕歲可省經費十餘萬緡而民間所重惟以旗弁交關為難今既有監兌則事可兩全議者憚於改作及後戶部尚書某斟酌條款奏行公私稱便其端實自鼎復發之也兼攝縣事值西南用兵供億旁午鼎復俄頃立辦然治事權宜互用以此被議落職卒於無錫縣行館鼎復篤於友誼工吟詠兼擅書法著有華鄂堂詩集武夷黃帥先為史道鄰參軍年老無所歸鼎復具舟迎之及卒為經紀其喪令其子就塾二女皆遣嫁之常州惲于邁為作古道行紀其事兄日芑字道兩亦為范達禮所薦通判山西平陽著涵秋

醫方若干卷乾隆賀志參道光通志

曾子駒字黎崖七都人順治初以貢入賞授無錫知縣時水旱疫癘相繼子駒先賑後蠲醫藥活人萬計釐漕弊革門面租捐築青城田岸積潦之地盡爲膏腴在任三年不名一錢鄉民以官清民安四字勒於石後以誤漕遷謫民爲建生祠復彙成詩歌集曰棠蔭

乾隆賀志參
道光通志

鄭宗謙一字益公十五都仙岐人順治辛卯舉人授河南開封府推官有參將董某恃勢橫行宗謙廉得其實按法治之民建生祠祀焉後卽以董某獄觸權貴引年歸

乾隆賀志參
道光通志

謝汝霖字用弼塔頭人康熙己酉舉人由教諭累遷知山西永甯州安集疲民革耗羨行戶諸弊興義學決獄催科不事刑威嘗謂民

長樂縣志

卷二十四

列傳四

十七

循績

日富而官日貧固所樂也永之人爲樹碑立生祠在官十三年及卒柩歸唯圖書數篋而已祀名宦

乾隆賀志參
道光通志

高于岡字克雝一字來儀臺瑤人康熙壬子拔貢松溪教諭課督多方捐俸脩葺學宮重建朱子書院增造書室爲諸生習禮所邑令沈煥爲勒碑記學使者丁蕙扁其額曰鱣堂令範有廬山續吟問軒詩集松源記績若干卷任九年擢建甯教授未之官卒

乾隆賀志

林謙光字道牧一字芝眉父逢經傳見忠義謙光康熙壬子副貢生官政和教諭延平臺灣兩府教授篤學勵行誨人無倦多士爲立去思碑擢知桐鄉縣移分宜所至潔己愛民興利除弊綽有循聲著臺灣府志臺灣賦歷朝甲子圖華鄂堂集行於世乾隆四十一

年祀郡鄉賢祠

同治彭志參
道光通志

黃天箕字行樞一字南亭南唐人家貧嗜學以老方聞康熙庚申舉人知山東曹縣約己裕民治獄平恕歲荒倡捐米千餘石助賑全活無算權知濟甯州救荒如曹縣又濬淺閘以資水利三載督撫交薦以勞勩卒於官乾隆三年福建大吏請以閩縣黃幹祠中別室爲天箕特祠年給祭資四金編入福建通志

乾隆賀志參
道光通志

陳天立字利震號英侯復升元孫康熙十九年舉人初任大名令緩徵恤刑民德之爲立生祠以親老乞養歸送者數百里丁憂服闋補涇縣政如大名歲饑天立捐廉煮粥以賑貧乏大水漂骸以千計立義塚瘞之復捐築河堤水患以息旋病卒於官

探乾隆賀
志選舉註

長樂縣志

卷二十四

列傳四

十八

循績

江雯字廷啓一字砥巖雲路人少有神童之目康熙辛未進士知鎮平縣值歲荒發倉煮糜全活甚衆丁外艱服闋補鎮原令歲不登雯巡視郊野詢疾苦賑貧乏以勞瘁成疾聞母訃卽日奔歸分田

產均諸兄弟卒祀鄉賢

乾隆賀志參
道光通志

鄭晃字子偉一字二瞻二十都人籍浦城康熙甲戌進士授鄖縣知縣建武陽堰設集場立納采問名之禮以絕訟源勸速葬禁喪殯演劇婦女廟哭諸陋習鄖處萬山外民死於虎無虛日作告虎文數日虎徙去攝鄖西縣修學宮復丁祭入爲刑部主事遷員外郎禮部郎中出爲廣東提學副使五載寸長必錄事竣歸里卒年七十二著有藏山堂集狴犴晨鐘拜石堂詩集華胥內外集偶筆詩

集粵東文誥集秋心集二瞻真稿乾隆賀志參道光通志

馬玉簡字介卿號心巖康熙乙酉舉人授湖廣安鄉令下車值水災立請賑豁全活甚衆邑豪民肆行不法按律治之自是斂迹卒之

日制撫知其貧令藩司資之以歸其喪探乾隆賀志選舉註

嚴夢兩字伯任一字覺軒性倜儻善詩文康熙戊子副貢補八旗教習雍正初薦授中書奉命四川丈量民田精密不苛民懷其德同官多被譴而夢兩獨於事畢加一等議功例擢主事以家貧親老乞外知慈谿縣有訟殺人者審鞫無凶器太守欲重其罪夢兩不可曰豈可殺人以媚上官乎攝台州甯波紹興三府同知大府重其才凡巡視海塘轉運官銅諸役輒檄夢兩董其事乾隆六年補

長樂縣志卷二十四 列傳四 十九

循績

義烏知縣專撫字緩催科脩學宮及東江橋好士下賢歲時進秀民訓導之縣試所拔多英才邑人以比連青天連亦閩人名一鳴有遺愛於義烏者也攝守某求賂夢兩拒之爲所中傷民爭訟冤大吏廉其枉得免官歸囊橐蕭然父老釀金爲贖夢兩家儒素無生業至是貧益甚遊粵東尋卒著有貽經堂詩集居官格言乾隆賀志

參道光通志

鄭純禮字復武一字履齋東隅人康熙己丑進士知山西安邑縣縣稱富饒純禮清廉勤慎值三歲大荒奉文賑粥多費倉糈五千餘石以虧缺被議去官民爲代完起復坐補原缺先調任平順父老環泣堂階者數千人去之日祖餞數十里墮淚攀轅如嬰兒失慈

母庚子甲辰秋闈分校甄拔皆知名士及復任安邑百姓歡迎甫半年陞禮部行人司協辦祠祭司事清理直省賢良祠給假歸囊餘一拂猶竭力倡修學宮捐祖祠田畝著有夢樵軒集子愈自有

傳乾隆賀志參道光通志

林瓊黈字光可一字朗山壺井人父嗣榮字斯獻性豪曠嘗謂族人曰吾族以海爲田不如以土爲田也捐斥地四百餘畝與從孫申甫築三塘計墾田三千畝初稅海鮮田頗難售嗣榮訴於官並豁海鮮諸稅至今利賴焉雍正庚戌瓊黈成進士以親老不赴選丁內外艱哀毀盡禮服闋授直隸高陽知縣蒞任值水災淹百二十村莊瓊黈恐官賑有稽時日先捐粥接濟脩舊堤濬淤塞水不爲

長樂縣志

卷二十四

列傳四

二十

循績

害縣中旗民雜處撫之帖然在任四年寬嚴互濟尤以課士爲己任以老疾乞休歸裝惟圖書數篋而已年七十餘猶手不釋卷卒於家著蘭瑞堂文稿四書說解唐詩直解左傳評註

乾隆賀志參道光通志

陳琦字乾德三溪人雍正癸丑進士知堂邑縣以清儉自持獄訟立剖下鄉減僕從毫不擾民收漕令民自解詳革梁家莊落地稅鄰民每歎曰吾儕福薄不能爲陳侯百姓也在任十年卒於官

乾隆賀志

參道光通志

鄭彝字善元一字依山古縣人乾隆丙辰進士知河南汲縣捐俸倡修學宮開惠遠泉潤田五十餘里民懷其德巡撫雅爾圖贈聯云案牘能清胸有竹絃歌不絕縣成花解組日囊無餘積汲之士民

立去思碑於西關外乾隆賀志參
道光通志

鄭漢章字序華一字雲亭西隅人雍正己酉拔貢試荏平縣丞權知武城知縣值水災查勘無遺攝博興開濬小清河濟南所屬均感其惠署沂州州同監司萬國宣重之輒與談論詩文資其匱乏丁內艱服闋補文登知縣移霑化六年五災以勞致疾卒於官闔邑士民哀號不絕柩歸有送至數百里外者著宦遊舒嘯詩集乾隆賀志

鄭愈字全哲一字慕韓純禮子雍正己酉年甫冠省父於安邑任所時秦地用兵詔求人才經督兵大臣薦舉賜帑金壹百兩發往陝西軍前差遣屢立戰功議叙引見授四川永甯縣再任黔江剛決有爲諸務並舉陞貴州麻哈州知州地僻而險苗蠻錯處撫之帖

長樂縣志

卷二十四

列傳四

二十一

循績

然民賴以安俗少讀書愈爲廣設義學聘延名師使之互相講貫一時人皆尙學文風丕振後從犵狁舊疆丁內艱歸葺角山居以鈔寫經傳爲事邑侯賀世駿延與脩志焉同治彭志

陳九鼎字敬彝一字新齋溝東人乾隆丙辰副舉人歷署廣東新會江門縣丞有政聲人以活菩薩稱之隣邑有以水利上控者數年莫決聞鼎精明兩造具呈請聽決鼎爲之平情定斷衆皆悅服調瓊山海口縣丞旋丁艱歸掌教吳航書院與脩邑志起補山東荏平縣丞陞邱縣知縣引經斷獄有儒吏風年七十致仕歸生平嗜學工文簿書之暇卽以著述爲事間或作畫隨筆所到人物畢肖深得八大山人遺法著四書便註未梓行子拱秀字希文號質原

邑廩生善草書片楮尺幅人咸寶之次光祖字希蘭號蘭仙善畫

蘭同治彭志

林調燮字德聚一字鹿沙東隅人博學工文年踰冠學使周學健拔取第一入邑庠乾隆戊午舉於鄉己未聯捷進士會試三藝皆再易其稿房師則儲在文中子也歷署直隸阜城新河無極南和井陘等縣所至有循聲先是真定途次多盜明火露刃劫掠行人燮以猛濟寬盜爲斂迹丁內艱歸服闋補靈壽吏懷民愛公餘課士月有常期八年不倦士民擬之漢文翁年五十六卒於官靈之人思慕其德祀諸書院以配陸稼書先生焉後三紀同邑陳念祖署靈篆猶及見其所得士口碑籍籍咸稱爲好縣官古之遺愛調燮

長樂縣志

卷二十四

列傳四

二十二

循績

其有焉著有象虛亭文稿同治彭志

蔣巖高字振泰一字魯瞻嶼頭人乾隆己卯舉人歷署山東萊蕪昌邑知縣授新泰令寬猛咸宜所至多惠政暇則論文課士己亥庚子兩次分校鄉闈鑒拔多知名士年四十八引疾歸建揖山亭於定山與二三同志閒步橫嶼湖優游自樂不預外事人尤高之卒年六十五同治彭志

陳疇字廷琚一字壽田古縣人省居乾隆壬午舉人初令楚中借補桂陽州州同州多積案詳爲清理深得民心調甯鄉賢聲日起補臨武縣擢靖州知州豪蠹斂迹畏如神明時詔舉承牧堪勝知府者督撫以疇薦丁艱歸起陞江西臨江府知府民好訟多上控摺

紳家又陰爲主持疇立法不撓干請悉絕民無有冤者旋入都改補湖南常德府調寶慶府疇熟於楚中風土人情再蒞其地興革益多嘗曰吾初出都門化龍姪握吾手曰吞得百頭腊蛇方可作外吏吾當官遇事時服此言又曰吾生平馭下只恩威並濟賞罰分明而已旋以年老乞休歸著有北行紀事詩集

同治彭志

馮鼎高字彝仲一字竹娛嶼頭人乾隆丙戌進士知湖南辰谿縣時大兵進勦緬酋供億絡繹不辭勞瘁丁外艱巡撫以軍興旁午奏留事竣歸里服闋仍起湖南權臨湘知縣先是湖北民來爭沙洲訐訟至五六十載不能決鼎高履勘究其原委分畫疆界俾各遵守遠邇咸頌焉三十六年調永定知縣攝湘陰地濱洞庭盜賊所

竄伏鼎高設法緝捕數月肅清尋回永定清理積獄脩龍州書院重建三賢祠移長沙修嶽麓書院大吏以卓異薦丁內艱歸起授河南新鄭知縣值水災請開倉平糶並借給籽種又捐廉煮粥賑餓者民困以蘇遷鄭州知州修管城書院時新蔡奸民滋事從巡撫富某往擒治之旋奉檄堵築祥符八堡缺口又赴考城壩工總理料廠引河遷知陝州大兵征勦甘肅逆回芻蕘糗糒備道行無滯州有廣濟渠歲久寢廢鼎高疏導之並葺治舊堤利賴甚溥又重建宋忠臣李彥仙祠葺召南書院擢江南松江府知府權按察使審辦勾容糧書案誅巨蠹者八人餘從未減輿論翕然移蘇州知府權蘇松糧道蒞任三載修治城垣改建沙湖石塘百廢具舉再

薦卓異計服官二十餘年凡有益於民者無不實心興建故所至有能聲大府咸倚重焉卒年五十八

同治彭志參
道光通志

陳士玉字岳有一字芝田古縣人省居乾隆戊子舉人令山西祁縣多善政務德化有兄弟爭產者其弟饋二千金士玉受之出金於庭動以至情曉以大義兄弟皆感泣還其金後以勘災忤大憲鐫秩歸囊橐蕭然幾不能備行李祁邑士民思之爲奉粟主配祀祁大夫祠方伯蔣君旌其閭曰民不能忘家居四十年絕跡公門年八十三卒

同治
彭志

謝春暉字齊璠一字蓮湖沙京人家貧力學乾隆戊子舉於鄉辛丑會試房師張涵虛佳其文力薦不售及晉謁廉知其植品積學挽

長樂縣志

卷二十四

列傳四

二十四

循績

留西席暉以親老歸養辭至再三張歎曰予何忍奪孝子心哉贈以金又辭張曰老母在堂聊佐甘脆耳乃拜受泣別截取期屆改授建甯教諭訓士首重倫常每朔望謁廟後卽集諸生於堂宣講聖諭臥碑時邑令江于湘都司李雪巖均負人望有三賢之稱俸滿調晉江邑人士泣餞遠送尋以老告歸宦橐蕭然卒年七十三著有蓮湖詩鈔子治泮精醫學積所得金梓其集行世觀察陳學穎爲之序

同治
彭志

劉永標字良瑞一字次北父廷舉安貧力學篤行工文由二劉村遷會城家焉永標少承家學與弟永樹並擅文名有二難之譽登乾隆丁未進士分發江蘇以知縣用值林爽文叛奉檄運糧浮海至

廈門差竣授江浦知縣邑小民疲前官虧庫金二萬餘永標受之躬行節儉以時彌補宅心仁恕罪犯在大辟者必原其不得已之情以故遇赦輒減等十餘年未嘗決一囚鄰境有越獄者偽刻印者獲之仍歸鄰縣不忍以同官降謫博一己遷除也嘉慶四年補欵已足遂引疾歸卒於家生平喜爲詩著有盥白齋集四卷作令後遂輟弗爲陳壽祺太史序之曰人或廢吏事而溺於詩君則輟詩而勤於吏事爲何若也子建樞乾隆戊申舉人著有九一山房稿建藩嘉慶辛酉舉人有東圃時文行世建庚建詔乙酉乙未同登鄉會榜建庚著有有爲齋詩鈔建詔著有宜蘭室集孫德威道光辛卯舉人尤深經學著有周官辨非及霽巖文稿累世縹緲

長樂縣志

卷二十四

列傳四

二十五

循績

各有著述省城稱家學者首推劉氏云

同治彭志參道光通志

鄭榕字道植一字蔭葦世居首占村父惟潤讓遺產於兄弟營生會城遂家焉榕生而穎異遊孟超然劉永標之門刻意勵行習爲古文詞乾隆己酉舉於鄉留京十年考取教習以知縣需次廣東署和平縣事政簡刑清日課諸生亶亶不倦士民德之頌以詩曰我母慈兮隸長樂人情得處卽和平語雖質蓋紀實也旋授瓊山令瓊爲海外十三島領袖差務絡繹榕獨辦理裕如得以盡心民事案無留牘獄無滯囚公餘則與多士說詩書敦禮樂公堂之上濟濟如也時蔡牽游弋海上常到瓊擄掠榕先事籌防民不苦寇泣瓊七年升同知以母老乞養歸士民沿途攀送步餞十數里不絕

得暑疾道卒羊城樞歸日宦橐蕭然

同治彭志

陳念祖字良友一字脩園溪涓人乾隆壬子舉人令直隸威縣善體民情不事鞭撻遇事能斷綽有賢聲尤精醫學辛酉夏三輔大水瘟瘧流行念祖以勘災到其地審天時問土俗相人體之肥瘠寒煖製藥丸三品散給城鄉全活無算家居後仍行醫濟世診病必詳審脈息料斷如神尤能起死回生超出羣醫之外韓總憲鼎晉稱爲仲景後身所著有公餘四種傷寒論淺註金匱要畧淺註等書行世目詳藝文志

同治彭志

黃觀書字萬鍾一字益齋觀營弟

觀營傳見義行

性魯而志篤乾隆壬子舉

於鄉歷任尤溪漳浦教諭狷介不苟取尤善訓迪每月課士令諸

長樂縣志

卷二十四

列傳四

二十六

循績

生以次受業因其材質之高下聞見之淺深而開導誘掖之其立教之法先行實次經義次文藝蓋一時之能立師道造就人材者必以觀書爲首稱焉道光壬午引疾歸旋陞邵武府教授不赴仍授徒於里不問外事遊其門者均能砥行勵名拔出流俗鄉評重之子春雲邑諸生以能文名於時

同治彭志

王起琇字績瑩一字玉圃年十七遊庠乾隆壬子領鄉薦大挑一等改就教職歷任甯德晉江龍溪教諭永春州學正喜培養人才每勸誠諸生力學敦品格守臥碑體恤寒士性端方絕干請所在有司禮重焉晚年臥病猶手不釋卷以子有樹累封中議大夫

同治彭志

陳心炳字希耀一字葭塘石門人本衣冠舊族心炳獨苦讀如寒士

嘉慶辛酉舉於鄉歷著湖南會同臨湘瀘溪新甯湘潭甯鄉等縣均有善政授醴陵令適蛟災之後縣城及沿河民居俱被漂沒心炳履任後議賑議蠲賴以全活者甚衆嗣復領修衙署重建考棚書院以工代賑撫卹多端在任三年士民德之以內憂去官衆依依不能舍鑄其政績於石家居近十年不事干謁人尤服其品之

高云著有韻語瑣掇四卷

同治彭志

陳澍雲字允龍一字松軒萬春四子

萬春傳見文苑

嘉慶辛酉拔貢庚午舉

於鄉考授鑲白旗教習秩滿以知縣用呈改教職性溫厚篤實正直廉平工詩善書法得黃山谷筆意任武平教諭士多固陋自安澍雲以忠孝廉讓訓誡諸生復爲之明經術定課程在任二十年

長樂縣志

卷二十四

列傳四

二十七

循績

士習文風翕然不變都人士以整齊嚴肅頌之並祀邑之崇文堂遷泉州教授祖餞塞途皆歌詩以志其教澤尋引疾歸惟圖書數篋而已生平力圖寡過不求人知壯歲授徒造就甚衆王文勤瑞瓚其最著也瑞瓚由觀察來閩游升巡撫前後近十年毫無干請年八十五以壽終著有漱芳山房詩集三卷文集一卷

同治彭志

高炳望榜名祖望字德彰一字琳圃文石人省居幼穎異年十三補弟子員旋食餼嘉慶丁卯舉於鄉授徒三十年及門登科第者踵接道光壬寅授安徽泗州州同地濱大湖胥役多藉緝捕之名苛役商船不敢停泊炳望廉知其情立除積習勒石湖岸舟舶輻至癸卯分校鄉闈稱得士甲辰春飛蝗過境積厚五六寸炳望誠心

夜禱蝗不爲災暇日進諸生與論詩文多所造就歷攝五河天長
盱眙全椒縣事皆有政聲己酉引病歸里宦橐蕭然子鑾宣道光
庚戌進士打箭爐同知同治彭志

陳堯書字諸典一字賡堂古縣人省居以典史赴陝西軍營効力升
知岐山知縣岐地土曠田肥西南五丈原與郿縣接壤卽諸葛忠
武由斜谷出師處原下水田千餘頃爲忠武屯田舊址年久渠堰
淤廢乃親往履勘捐廉千餘金挑脩六隄民利賴之城鄉立義學
五處並請建義倉勸捐粟七千餘石以濟常平之不足取其羨餘
資義學調補咸陽邑南鄉濱澧渭積年泥壅河身日高每逢盛漲
漫入田園乃倣區田之法令按畝濬溝以備宣洩俸滿引見特旨

長樂縣志

卷二十四

列傳四

二十八

循績

召見異數也進漢中府佛坪同知署商州直隸州事卒於官堯書
雖援例入仕然嫻吟咏工書札其夷門懷古句云公子不辭通患
難美人未免重私恩佛坪感懷云官俸難儲三日蓄註云地不產米販者亦罕
家書常抵萬金看風調可想有政餘吟草一卷同治彭志

陳仁淳字于安一字洽浦雲路人道光戊子舉於鄉壬辰成進士署
安徽廬江令甫下車卽禁止賽會甄拔人才尤慎用刑凡大小獄
訟悉心研鞫務得其情不輕加以鞭朴時沉澆甫平室家粗奠仁
淳多方撫字教育兼脩僅三月以勞瘁卒於官未竟其用士民惜
之同治彭志

高樞字脩仁一字紫垣龍門人道光癸巳進士授河南正陽知縣邑

多捻匪至則懸賞擒獲捻首何在
天等餘匪遠遁四境賴以安謐
已亥庚子分校鄉闈稱得士著有養志堂吟稿四卷

同治彭志

鄭廷珪字用桐一字桐侯榕胞姪家貧事母孝母善病侍湯藥衣不解帶道光甲午舉於鄉以母病不赴春官者十年丁母憂服闋甲辰捷南宮卽用浙江以清慎勤自勗嘗謂一絲一粟皆閭閻膏脂過分卽戾天和歷任象山安邑金華江山諸縣所至興利除害脩建書院與邑文士講藝必申明聖賢義理士論翕然上官善其政舉卓異丙午辛亥分校浙闈稱得士以病歸卒於家

同治彭志

王錫桐榜名桐字貞運一字煦甫父溱傳見文苑錫桐咸豐辛亥經魁揀發浙江知縣時左爵督宗棠由浙入閩令閩人仕浙者陳事

長樂縣志

卷二十四

列傳四

二十九

循績

宜錫桐首以足糧食肅功令精募勇慎遣將培人才振士氣挽民風平物價復盛典彰苦節十事對巡撫馬新貽嘗語僚屬曰王令講求吏治將來定一員好官乙丑分校浙闈稱得士權桐廬縣事屢經兵燹田廬荒廢者十之三四錫桐設法安戢躬親畝畝督令開墾並爲之丈量籌給耕種民困始蘇以積勞成疾逾月卒貧無以殮同鄉爲之營後事並扶櫬歸子鍾泰庠生

同治彭志

黃翼爲字景弼一字穀臣青山村人咸豐己未進士觀政吏部謹交游慎取與人有干以私者峻拒之庚申秋京師戒嚴同官紛紛請假翼爲曰人臣大節難虧太平則養望爲高臨變則相率而去天下後世其謂我何仍在署辦事如常同治元年護送文宗顯皇帝

梓宮禮成加一級中途得寒疾旋聞母訃以哀毀卒於京邸士大夫聞者多爲流涕云

同治彭志

陳贊字大琛號翊圖青橋人生而岐嶷性嗜學年十五補博士弟子員食餼道光庚子登賢書咸豐壬子成進士歷知河南沈邱淮甯固始等縣爲政務滌煩苛以求實濟任固始時值匪氛未靖邑當皖鄂之衝髮捻諸匪時常竄擾贊修城堡繕器械督練鄉勇防剿並施破賊砦數十以功升知府而兵燹之後瘡痍未復贊復招徠撫綏不遺餘力洎固十年士民感戴爲立德政碑於署前丁艱服闋權知彰德府歲大祲捐廉施賑全活無算嘗監試文闈剔奸釐弊能得窳窳充同考官時所得多英才旣解組歸課子作基文明

長樂縣志

卷二十四

列傳四

三十

循績

先後均捷秋闈贊於光緒壬辰重遊泮水嘗偕同邑黃見三纂修縣志年七十五卒遺命自所居鄉起至北山村捐築石路行人德之

黃見三字景知一字心垣青山下人祖觀營父一桂均有傳見三中咸豐癸丑進士歷知河南杞縣汜水內黃林縣太康等縣及鄭州升補睢州知州見三以經術節吏治所至勤政愛民振興文教士人有對簿者輒不假刑威必反覆開導俾其愧悟而後已任內黃時馬賊圍城見三督隊防堵城賴以全生平博極羣書精熟史事工制義爲同考官輒有擬墨每一藝出土子傳誦之大僚子姪及所部之民游其門而取科第者甚衆性慷慨矜恤寒峻而尤篤友

誼士貧不能赴禮部試者贖之同郡許利賓卒於某縣任內見三爲經紀其喪代完虧帑遣僕護其柩眷以歸其孤貞幹因受業於門後成進士見三晚年潛心五子之學著學宮景仰篇四卷全史輯要二卷同治八年在籍守制邑令彭光藻聘脩縣志服闋之官尋以分校鄉闈積勞成疾差竣而卒年六十有四

林調陽榜名秋奇字燮軒一字瘦山洞湖人咸豐己未亞魁同治乙丑進士授安徽鳳臺知縣未蒞任調望江值兵燹後元氣未復調陽下車卻額餽鋤積猾理冤振滯撫卹瘡痍重建來僊書院捐修化龍橋方公堤劉猛將軍廟百廢具舉暇則論文講學雖日與邑諸生羣聚衙齋然無敢干以私者丁卯歲荒以籲請減征獲譴虧

欠解額大府檄追嚴急民釀金以償得回任丁憂服闋權青陽其治一如望江光緒壬午復知望江時邑大水縣北數十圩沒爲巨浸調陽躬督工役日冒風雪逾年而圩工成民建生祠以祀調陽素負文名性鯁介所至絕苞苴以故鄉闈輒得分校所取多知名士乙亥亞元丙子解首皆出其門有某顯宦子闈前通關節欲出調陽門以掩其跡介人爲道地請以二千金壽調陽峻卻之後爲同官某所羅致薦而獲售卒藉其力題升知府人咸笑調陽愚弗顧也服官十餘年前後凡三至望江一蒞青陽一以撫字爲事事有不便於民者雖大府嚴檄不爲動引疾歸襆被蕭然圖書外無長物

董炳章前董人同治壬戌舉人授上杭教諭修學宮置祭器捐俸復月課士紳延主講邑琴江書院嚴課程增膏伙文風日盛旋調臺灣淡水教諭兼主講明志書院興學教士如上杭時臺民素好訟炳章力革之士習爲之一變期年卒於官門人歸其喪上杭淡水皆祀名師祠著有經義解紛四卷屈蠖齋集藏於家

劉樹桂字小山二劉人學問淹博試縣府院皆冠軍旋食餼同治癸亥恩貢署福甯府教授嚴立課程訓士必循禮法拔諸生之秀者讀書齋中賞奇析疑終日不倦性慷慨鄉居時遇歲歉出穀平糶婚葬無力者仗助不少各邑令徐承禧濬陳塘港經理難其人樹桂毅然任之卒以成功孫成傑傳見文苑

長樂縣志

卷二十四

列傳四

三十二

循績

林濟字作舟有幹略家貧傭書以給同治甲戌就某參戎幕稍知名於是歷佐鎮帥幕府光緒間以例授陽山知縣下車革陋規清積牘日坐堂皇令下狀者鳴梆而入閤者不復爲梗至輒集取兩造剖判既竟日未移晷也有以爭產故死一人舉宗十七人均下獄濟喟然曰以一人坐及舉宗是前吏之不善於讞也鞠之蓋誤傷而致命者爲平其產訟遂釋旱禱雨於社行赤日中數里積十日雨集而濟中暍遂不起年四十九

陳春瀛字幼海古槐人同治癸酉舉人光緒己丑成進士試刑部改直隸州知州指分四川權忠州州獷猛多命盜獄歲以三四百計前官皆痛繩以法春瀛曰是治流也非清源也乃興水利勸民力

農桑以充衣食創藝塲游手者使量力營生逾年而案牘以清教民某武斷鄉曲春瀛擒而置之法教士有違言援萬國公法以折之公餘延接英俊談詩論文以爲常尤好獎掖後進興書院脩四賢祠皆捐廉爲之倡大府廉其能辟司機要士民攀留不得至有泣下者而春瀛竟以積勞致疾卒年五十三生平博聞強記留心時局隨使東西各國險要政治無不周知制軍岑毓英張樹聲奎俊咸器重之歷佐大僚幕府一時章奏多出其手所著詩文章奏等稿未梓存於家

鄭鏡字肖彭首占人祖元模道光丁酉舉人掌教吳航爲時名師父景灃咸豐辛亥舉人隨左文襄西征歿於幕次鏡幼穎敏善屬文

未冠籍閩縣學第一光緒乙酉舉於鄉己丑成進士籤分刑部改知縣權丹陽邑有積獄久不決鏡至一訊而服歲荒先鄰境行平糶邑無饑民旱禱雨立應受事四十日丁艱去尋充中西學堂漢教習時初興西學少年熒於異說率誕妄離其宗鏡力持正論搓其孽芽學者肅然服闋權無錫時已感疾下車剔抉爬羅忘其勞憊有訟不孝者令荷校以徇判詞沈痛悱惻讀者淚下未期月卒官性孝友家故貧雖舉債山積所以博親歡者無不至閩俗產女多不舉鏡偕同郡陳景韶請當事厲其禁立育嬰局以收貧孩間涉歧黃多所全活子寶菁寶芝弟籌名與埒壬午舉人癸未進士李錦字綱齋仙山街人光緒己卯舉人已丑大挑一等是科成進士

呈改教職授延平府教授到官立課程嚴條教隆冬盛暑講學不輟一時執經者爭後先而黌舍以滿爲人端方和藹不干有司唯事關風化如敬節拯嬰之屬孜孜籌辦傾囊不吝也嘗印送善錄謂中人以下當以因果勸之生平寡交游獨師事同縣謝章鋌留心考據之學學使王錫蕃戴鴻慈秦綬章疏其學行聞於朝

高鳳岐字嘯桐號媿室父紹曾傳見孝友鳳岐光緒壬午舉於鄉嘗佐林啓治杭州府佐方家澍治桐鄉秀水等縣多所建白旋入粵督岑春煊幕時廣西亂奔走兵間贊軍務甲辰以知縣需次浙江岑又奏調歸粵以平匪功擢權梧州府值大亂後盜風甚熾常自督兵役巡緝得劇盜必反覆告以應死之故退語家人曰此饑寒

長樂縣志

卷二十四

列傳四

三十四

循績

無告之民流而爲盜法當死而情可矜於是知專事捕誅非治本計乃設工藝廠收窮民盜以稍減有舉子武斷鄉曲集訊時抗辯不少屈鳳岐喻之曰吾與君均讀書人今吾坐堂皇而君階前對簿君之辱吾之恥也舉子亦愧服其善感人也如此居官勤治事夜輒剪燭理案牘家人苦勸不能止曰縣不能決乃至於郡我視爲小事而吾民之身家係之奚容緩未幾果以積勞謝病去養疴滬上各大吏屢徵辟皆未應侍郎于式枚以御史薦廷試第一例得記名權貴恐其不利於己尼之復歸滬上以病卒彌留時猶以氣機轉中國有望爲言蓋至死不能忘君國也後浙人以佐治功配享林太守於孤山

陳兆煥字筱文青橋人省居同治癸酉舉人甲戌聯捷進士以卽用知縣分陝西性廉介陝撫譚鍾麟早聞兆煥名然兆煥不常事衙參鍾麟歎曰不奔競者必爲好官益重之一日奉差乘馬出跌傷上書願改教官鍾麟強慰留之丙子分校陝闈所得多知名士左文襄公督陝甘與鍾麟合奏特例授大荔首縣有巨族爲錢商負民間歛鉅兆煥錮之巨族恨刺骨其子舉人官京師思中傷之短兆煥於某部受其困者二十年兆煥晏如也後署洽陽又署醴泉卒於官貧不能殮邑士民爲治其喪

林振光字芝馨碧嶺人父成潭字壽彝性孝友勇於赴義幼貧操工業所得資悉充善舉不吝也故親屬里鄙無不沐其惠振光以邑

廩生中光緒乙酉副舉人已丑舉人甲午成進士授廣東會同知縣清積弊平冤獄公出必輕車簡從事理而民不擾馭胥役尤嚴雖巨猾不得售其奸未幾署臨高臨高民早聞振光賢相率迓於郵溫霽可親笑曰夫子果無以異於人邑豪有希求邑令者聞新令來必要於路百計致新令歡冀固其盤踞振光至邑界果有袖苞苴進者峻卻之民益信令賢臨高素多盜振光曰治盜必除其窩時以他事便道抵其穴殲其魁餘則諭以順逆禍福之理輒感泣而散廣東賭風素熾臨高尤甚振光禁之嚴甘其利者每啗以巨金不爲動以此地方寧靜風俗以淳旋告歸宦橐蕭然至不能治行具邑士民劇錢以助始得歸著有迎碧山房詩文集海南公

餘隨筆若干卷

林秉芳字蘭忱上店人省居未冠以府試冠軍補弟子員光緒己丑領鄉薦幕游於江蘇吉林等處尋吉撫以揀選縣奏保留吉署濛江知縣蒞任後孜孜圖治凡福國利民之事靡不悉力爲之未幾以積勞得疾卒於任秉芳以清廉自勵雖累膺樞務而宦橐猶罄如也

